



Diahuebs atardi

Club di Movimiento ta cera e siman di actividad special na biblioteca cu un espectaculo di baile



E presentacion di Club di Movimiento bou direccion di Sra. Samantha ta consisti di 11 baile diferente. Lo tin Street dance, polka, ballet clasico, baile contemporaneo, Funk Jazz, salsa y un baile titula 'Brasileira'. Publico por spera bailarinanan di tur edad, chikito y hoben cu trahe special.

Club di Movimiento

Club di Movimiento ta un scol di baile cu pa mas cu 15 aña caba ta situa na Bubali. E scol ta acepta mucha di 3 aña bay ariba y ta ofrece les di ballet, character, jazz, baile moderno-contemporaneo, tap, latin, streetdance, aerobics, Belly dance, samba y afro pa mucha y adulto. Na Club tur alumno ta

conta. E ta un scol di baile activo den comunidad y e ta tuma su responsabilidad socio-cultural di desaroyo di arte di baile na Aruba hopi na serio.

Ademas di siña baile, algun di e metanan di Club di Movimiento ta pa siña alumnonan crece cu confiansa, curiosidad, iniciativa, miho disciplina y motivacion den bida, y pa respecta su amigonan actuando semper husto un cu otro.

Historia recien

Na Februari 2012, Club di Movimiento su alumnonan a biaha pa participa den Prix Arabesque na Belgica. Na Maart 2012 Club di Movimiento su alumnonan a baila na Fiesta Rotaria. Na April 2012, Club di Movimiento

a forma Youth Ballet Companionship. E meta di Youth Ballet Companionship ta pa ofrece nos hobennan e oportunidad pa enfoca y mehora nan tecnica di baile pa asina nan por bay competi den exterior y por haya un miho oportunidad den area profesional di danza. Na mei 2012, Club di Movimiento su alumnonan a baila den 'Open Dag' di Mariniers Kazerne. Na Juni 2012, Club di Movimiento a presenta e recital anual, Movements without limits... That's who we are! 15th Anniversary Recital. Na September 2012, Club di Movimiento a organisa na Cas di Cultura un Fundraising show pa studiantenan por a competi na Merca. Na October 2012 Club di Mov-

imiento a biaha pa Merca, cu un grupo di 17 mucha den categoria di edad di 9 te cu 20 aña pa competi den categoria Ballet Clasico y Contemporaneo na e Festival 'International Youth Dance Festival of New Jersey'. E alumnonan a clasifica na di 3 luga cu 2 baile contemporaneo ('Little things out of my head' y 'Progressions by number-number' 1). Jillian Oduber a ricibi un Achievement Award pa su Jazz solo performance - Funk Jazz. Na November 2012 Club di Movimiento a baila na Cas di Cultura y pa durante e Dia Internacional di Derecho di Mucha. CDM Youth Ballet Companionship a baila na apertura di e Sculpture Garden di Queen Beatrix Airport. Recientemente

na December 2012, 35 alumno di Club di Movimiento a participa na Nutcracker Ballet performance organisa pa Kozlov International USA, na cas di Cultura.

Club di Movimiento ta participa na diferente evento cultural cu ta yuda e estudiante conoce su mes miho y habri horizonte di alumnonan dor di baile, tuma les y intercambia cu otro scolnan di baile den un atmosfera constructivo. E experiencia bunita di baila ta necesario no solamente pa e alumno, sino tambe pa e juffrouwnan, mayornan, y pa e publico Arubano en general. Pues biblioteca ta spera un y tur pa diahuebs atardi 6or.